

左恪靖侯奏稿續編

恪靖奏稿續編卷十一目錄

官軍追擒疊勝現等剿辦摺

劉松山等會剿大勝片

官軍續勝現等會剿摺

官軍剿擒大勝詳細情形摺

請陳國瑞交出西河南撫臣節制片

郭寶昌受傷給假片

由德州赴天津截剿摺

委春壽劉松山充當翼長片

賊由天津靜海折竄分道防剿摺

馳抵吳橋會剿摺

劉松山等軍獲勝片

請獎敍中書吳士邁片

官軍追賊入直兩獲勝仗摺

賊逼運河馳回吳橋防剿摺

官軍追擒疊勝現籌勦辦摺

奏爲官軍追截擒逆疊獲勝捷現籌勦辦情形恭摺馳
陳仰祈

聖鑒事竊捻逆自清化折竄被豫軍擊敗後由原武揚
武向延津封邱一帶東竄各軍隊追截本月初八日賊
騎馳近延津南關經該縣督勇用礮擊退初九日酉刻
劉松山郭寶昌喜昌等抵延津之張家莊偵知賊踞封
邱之謝店岳寨陳道趙村康店華莊等處卽於是夜三
鼓寄留輜重拔隊進剿劉松山傍北向謝店一帶進郭

寶昌傍南向岳寨一帶進馬隊均在後繼發劉松山行
距謝店數里賊已吹角齊隊當令提督易德麟李就山
胡文高唐光輝由左提督楊福交胡文貴蘇松鎮章合
才由右自率提督陶定昇易致中何作霖總兵喻執益
居中分三路前進以提督蕭章開李雲貫楊清源黃萬
友總兵周國勝知縣李樹棠各營爲策應比抵謝店步
賊依村結陣騎賊從兩面直前猛衝當經擊斃數十名
賊不能支卽向陳道敗走步賊亦卽上馬皆遁時已黎
明官軍乘勢猛追立將陳道康店踞賊一併擊敗比見

郭寶昌所部與賊鏖戰正緊飛飭右路楊福交等助戰
合力擊敗悍賊賊併歸一路敗逃張總愚見官軍追急
賊黨同撲騎賊兩面衝突抄出官軍之後步步賊挺矛猛
撲劉松山督隊鏖戰逾時殺賊甚多鎗斃賊馬尤夥賊
始卻走喜昌與全福春山吳爾賡額各馬隊擊左路抄
後騎賊劉松山所部馬隊擊右路抄後騎賊各有擒斬
馬步合兵追擊二十餘里至封邱之劉古村追殺悍賊
甚多敵賊向東北竄走計初九夜間接戰至初十日收
隊時擒斬悍賊雖其祇五六百名而酣戰時賊中人馬

受傷不可勝數破賊巢二十餘處奪獲騾馬六百餘匹
軍械無算劉松山所部總哨官記名提督周盈瑞力戰
陣亡哨長記名總兵譚上連受鎗子重傷併陣亡弁勇
十七名受傷四十四名郭寶昌所部戰事尚未接其稟
報據劉松山喜昌程文炳張曜宋慶呈報均稱郭寶昌
因身先士卒思擒逆首張總愚致頭被刀剝骸中鎗子
傷且甚重俟得該軍稟報再行續陳其程文炳一軍初
九日向延津封邱進發夜見太行隄以南已有火光催
軍亟進初十日辰刻抵封邱東北二十餘里之白台梁

谷一帶造見飛塵蔽天謂爲賊騎程文炳飭參將王心忠馬隊向東北抄擊總兵劉先文李鎮國自東截之李得勝在後策應自率馬步親兵營進勦賊眾正向東趨官軍出其不意突前迎擊守備韓大武率隊直搗中堅各路馬步分頭衝殺約有一時許斃賊無數賊不測官軍虛實紛紛潰竄張總愚猝挾悍賊二千餘騎自東衝至步賊蜂擁繼進圍撲官軍程文炳揮軍迎敵李得勝率隊馳至士氣更壯程文炳飭劉先文自右衝殺李鎮國向前接戰自率親兵迴環策應內外夾擊回合十餘

次韓大武與都司李得勝手刃紅旗悍賊數名賊勢披靡悉向東北敗走程文炳督隊追殺十餘里至滑縣之老莊甯莊等處始行收隊計前後擒斬陣斃及轟傷者共約一千餘名奪獲騾馬軍械甚夥官軍陣亡守備范錫之一員受傷十餘名方劉松山收隊駐劉古村時聞程文炳在北面白西而東遇賊大戰亟督隊馳援旋聞程文炳已將賊擊敗始令收隊此初十日封邱境內劉松山等勦賊獲勝並程文炳一軍大獲勝仗情形也張曜於初十日行抵滑縣之大劉莊探悉賊騎已有由長

坦直奔東北者遂與宋慶會商劉松山等擬由滑濬繞
赴南樂朝城截勦十二日申酉之間宋慶張曜均抵滑
縣東南吳村一帶偵悉賊踪不遠正擬蓐食前進該逆
先向宋慶所部猛撲宋慶督參將劉廷等整隊迎擊營
官馬玉坤程永和鄧林楓均下馬步戰擊敗北面之賊
擒斬數百名張曜督總兵程之偉等率隊繼進由南堦
繞直抄賊後奮力縱擊敗其騎賊副將蔣東才率隊歷
擊該逆三面受敵紛紛敗潰遺械徧野追十餘里賊復
回拒適劉松山馬德昭馳至賊向東奔程文炳牛師韓

亦由東南來會該逆復折奔東北張曜又追十餘里至
王新莊日暮收隊是役該逆搏鬥更猛宋慶張曜所部
傷亡亦多已飭查明開報此十二日豫軍在滑縣東南
克獲勝仗情形也竊維近日賊情窮而益悍蓋以大河
阻其前追師躡其後首逆張總愚嗾諸賊於死裏求生
急圖返噬故其死黨皆乘健馬拚命衝突以薄我軍而
各軍轉戰日久究不免稍形勞頓各將領急於滅賊往
往奮不顧身轉戰愈力傷折頗多郭寶昌因欲陣擒逆
首以致登受重傷能否醫調痊愈尙未可知而該軍進

剿正緊之時急切乏員統領殊恐不能得力臣宗棠前
奏所以不忍過加督責者此也臣宗棠抵彰德時郭松
林楊鼎勛向滑滑前進接據郭松林緘報十二日午刻
行抵滑縣擬於卽夜馳赴開州清豐一路進勦李鴻章
十三日巳由大名啟行赴南樂開州臣宗棠十五日馳
赴大名拜摺後亦卽由大名前進分道會剿務期迅殄
狂氛以紓

宸厪所有官軍追勦叠獲勝仗現籌剿辦情形謹合詞
恭摺馳陳伏乞

皇太后

皇上聖鑒訓示施行謹

奏 同治七年三月十七日

劉松山等會剿大勝片

再正拜摺間接據張曜宋慶郭松林楊鼎勛稟緘十三口劉松山喜昌及郭寶昌所部會同張曜宋慶馬德昭在滑縣封邱之間痛剿捻逆截賊爲二大獲勝仗郭松林楊鼎勛由滑縣之北繞出東南壓剿與劉松山等軍不期而會牛師韓亦率馬隊馳至該逆三面受敵驚惶

無措旋向西南封邱延津之間突竄是役鏖戰極惡殺
賊極多郭松林楊鼎勛兩軍大獲勝捷情形計李鴻章
業已馳報所有陝豫各軍合剿大勝詳細情形俟得劉
松山等呈報再行恭摺馳陳臣宗棠前聞賊自封邱長
垣東竄李鴻章必將移師亟趨大名冀與晤商一切現
在賊既復向西南李鴻章聞將回駐大名臣宗棠仍卽
視賊所向赴彰衛一帶督剿謹附片馳

奏伏乞

聖鑒謹

奏 同治七年三月十七日

軍機大臣 字寄同治七年三月二十二日奉
上諭左宗棠奏官軍剿擒疊勝並擬馳赴彰衛督剿各
摺片昨據李鴻章李鶴年先後馳奏情形大略相同已
諭令該大臣等分路兜剿著卽懍遵前旨嚴飭各軍相
機剿辦毋令旁竄致成不了之局現在逆勢窮蹙拚命
狠鬪冀圖逃逸實在意中我軍當於奮勇之中仍寓持
重之意劉松山等軍追剿旣屬勞苦而郭寶昌欲生擒
首逆致受重傷尤可嘉尚卽著左宗棠李鴻章英翰李

鶴年傳諭各將領令其奮勉圖功一俟奏凱必當大加
賞賚用酬殊勲左宗棠擬赴彰衛一帶督剿著卽相機
馳往逆情詭譎難保不乘虛西竄該大臣務當於澤絳
各隘口仍撥兵嚴防並著鄭敦謹隨時督飭防軍加意
堵扼毋稍大意李鴻章現在東路如賊有東竄之信卽
著督兵迎擊並著丁寶楨妥爲防範官文於滹沱南岸
務遵歷次諭旨派兵嚴堵李鶴年英翰卽著會同左宗
棠所派各軍四面兜剿以期迅奏膚公所有力戰陣亡
之提督周盈瑞守備范錫之並兵勇等均著左宗棠查

明奏請優卹將此由六百里各諭令知之欽此

官軍續勝等會剿摺

奏爲官軍剿擒續獲勝仗賊踪折向東竄旋趨東北謀
渡衛河官軍來河躡追力遏北竄賊旁逸山東邊界現
等會剿情形恭摺陳仰乞

聖鑒事竊捻逆自三月十三日受創後向西南駛竄十
五日辰刻程文炳一軍行抵衛輝城北十餘里地方瞥
見道左五里許飛塵蔽天程文炳嚴陣以待令馬隊潛
抄賊後賊果向步隊猛撲分股盤旋程文炳督隊環施
鎗炮賊勢稍卻旋又突前死鬪官軍仍整隊環擊賊眾

卻而復前者三皆經擊退悍賊帶傷墜馬者甚多維時
郭松林楊鼎勛兩軍適從西南馳至程文炳飭長矛隊
乘勢猛進賊向東北敗走馬隊從北面橫截而出裹騎
賊約四百餘名殲擒殆盡其大股賊仍向東北飛奔而
逸是役陣斃悍賊三百餘名生擒三百餘名轟傷賊馬
五六百匹程文炳所部受傷十餘人喜昌春山聞鎗炮
聲催隊前進賊騎六七團向北飛撲當派富珠之西常
阿納蘇肯等向前迎擊擒斬五十餘名其郭松林等獲
勝情形由李鴻章陳報此十五日衛輝迤北程文炳喜

昌等軍剿賊獲勝情形也十七日到松山程文炳全福
馳抵延津縣東北二十里胡家莊偵賊復由東北折竄
西南又出延津迤南徑向西竄十八日辰刻各軍由延
津北向西南進至陽武屬延州寨適賊已竄至寨西七
八里一帶村莊劉松山卽商令程文炳由寨東進右路
自率所部與全福馬隊由寨西進左路橫出截之甫行
二里遇騎賊近千猛撲而來劉松山麾各營急進奮威
衝殺截賊爲兩提督陶定昇易致中喻執益易德麟由
左路擊前股之賊提督李就山胡文高唐光輝楊福交

蘇松鎮總兵章合才由左路擊後嚴之賊劉松山自率
提督胡文貴蕭章開李仁貴楊清源總兵周國勝居中
策應商令全福及提督余虎思馬隊相援抄擊賊勢不
支紛向東北狂竄斬馘甚多其落後之賊二百餘悉被
擒斬追至夾隄大風揚沙咫尺莫辨遂收隊就近村駐
紮是役計共殺賊三四百名生擒一百七十餘名內有
賊目趙四保王正三胡老元等數犯立於陣前正法解
散脅從不計其數奪獲騾馬四百餘匹軍械無算官軍
陣亡五名受傷十八名記名總兵何明順單騎陷陳被

賊鎗子洞留陣亡此十八日到松山程文炳全福等延
津東北剿賊獲勝情形也臣宗棠時在大名營次聞賊
趨西南卽於八日拔隊三晝夜馳抵湯陰擬親赴衛輝
督剿二十一日冒雨至宜溝驛適李鴻章營務處浙江
處州鎮總兵馬德順自臣宗棠行營回開州行抵滑縣
五隆渡見賊騎趨東北窺渡衛河飛騎回報時喜昌等
馬隊方以賊勢北趨馳赴宜溝行營合隊遂令喜昌與
春壽各率馬隊先發臣宗棠率步軍繼之是夜四鼓向
五隆渡口疾趨春壽喜昌抵五隆賊隔河窺見旋即循

河竄走臣宗棠繼至察看衛河淺處甚多河身又狹虛賊涉淺竄渡卽督馬步各隊循河追截賊方於五隆東北牽船欲渡見官軍馬隊馳近卽毀渡船篙槳器具乘而登岸復向東北臣宗棠飭馬隊探追直至大名東南之龍王廟渡口步軍疾馳繼進行近大名聞賊至龍王廟南岸知北岸官軍大至折而向東率親軍赴大名計二十二日寅刻至二十四日午刻循河紆迴截行二百八十里馬步各隊飢疲實甚幸賊以西岸官軍大至未敢渡衛犯直而大股則已向山東朝城冠縣莘縣聊城

一帶竄走現與劉松山張曜宋慶程文炳晤商飭各軍
挑選馬步隊伍採備軍食卽日親率渡衛向臨清州一
帶前進視賊所向由北面壓剿而下與李鴻章南路追
軍合力夾擊不敢以滯奉

諭旨飭顧西路拘泥不前至十五日以後賊蹤奔竄李
鴻章所部戰事計已由李鴻章馳報矣所有官軍剿擒
獲戰及賊窺衛河官軍夾河躡追賊竄東境現籌會剿
各情形謹合詞恭摺馳

奏伏乞

皇太后

皇上聖鑒訓示施行謹

奏
同治七年三月二十八日

官軍剿擒大勝詳細情形摺

奏爲恭報三月十三日官軍剿擒大勝詳細情形仰乞
聖鑒事竊臣等前將三月十三日官軍在滑縣境內兜
剿擒逆獲勝大略情形附片陳報茲據劉松山呈報張
曜宋慶劉松山喜昌等先後行抵滑縣之莫村一帶正
駐營間探報賊騎已至宋慶營前劉松山整隊前往賊
方與豫軍相持見官軍大至卽向東北敗走官軍合力
追擊沿途擒斬頗多日暮收隊十三日五鼓劉松山喜
昌等向東北繞進以圖截剿行三十餘里至小寨賊之

輜重已悉數前行其馬步悍賊盡伏村中村後伺官軍
至蜂擁而出騎賊兩旁分抄步賊直前猛撲劉松山將
輜重圍聚一處四面列陣結方陣以禦賊賊窺見官軍
輜重益逼兇衝撲四五次均經官軍鎗炮環擊刀矛撥
刺陣斃馬步悍賊百數十名傷者甚衆賊始漸卻劉松
山撥營專守輜重派隊分路進擊以所部馬隊與喜昌
等馬隊張左右翼以進賊見官軍布隊其左右兩路騎
賊及抄過官軍後路之騎賊悉退併前而排列待戰劉
松山麾軍猛進賊殊死鬪官軍愈戰愈厲斃賊甚夥賊

向西敗走方馬步官軍整隊壓擊之際騎賊三十餘團
猛撲馬隊先經營總富珠哩博奇圖西常阿訥蘇肯帶
隊擊敗該逆紛紛北走喜昌督富珠哩博奇圖趙福信
等春山督營總雙全保陞等合全福所部擊賊之腰賊
仍列隊拒敵我軍整隊環擊斃賊百餘名賊敗走劉松
山喜昌等合軍追殺闖北面炮聲不絕則郭松林楊鼎
勛兩軍正由北然勦而南也賊見官軍數面追殺折向
西南奔竄又值張曜一軍暨西常阿納蘇昔馬隊自東
南向西北截出賊愈胆落狂奔官軍乘勝又追二十里

餘至滑縣西南沿途殺賊不計其數劉松山等因鏖戰甚久暫令軍士憩息飛調輜重合隊復行二十餘里至劉家村一帶駐紮是役劉松山喜昌張曜宋慶各軍共計殺賊一千餘名生擒二百餘名賊目張元六邱正洪胡同吉馬大觀等四名均爲劉松山所部擒斬拔出難民以數千計奪獲戰馬三百餘匹軍械無算劉松山所部參將唐永清力戰陣亡應請

旨交部從優議卹以慰忠魂其餘陣亡弁勇十四名受傷三十七名容再查明辦理所有三月十三日官軍剿

檢大勝詳細情形謹合詞恭摺補

奏伏乞

皇太后

皇上聖鑒訓示施行謹

奏

同治七年三月二十八日

請陳國瑞交山西河南撫臣節制片

再臣宗棠欽奉三月十七日

諭旨陳國瑞本係交左宗棠差遣嗣因逆氛逼近畿輔是以改歸神機營節制今捻逆既深入豫境著仍歸左

宗棠節制並著該大臣傳諭令其將神機營前給鈐記繳回由左宗棠派員解交神機營查照前敵各將領之例另給木記以資稟報軍情之用該侍衛所部勇丁並不得逾三千之數著左宗棠詳細查明妥爲裁撤嗣後該侍衛營中軍餉軍械卽由左宗棠隨時撥給此中輕重機宜諒該大臣自能斟酌辦理也欽此竊惟陳國瑞一軍前據咨報已於初十一等日前赴山西約計程途此時當已由壺關出天井以赴濟源臣現又由宜溝折回大名相距更遠所有刊給木記飭繳神機營前給

鈐記委員解京查銷之處已謹遵

諭旨咨請山西撫臣就近欽遵辦理該軍勇丁不得過
三千人之數已遵

旨行知陳國瑞飭其恪遵毋准擅違致干察辦至該軍
軍餉軍械如以三千人爲度按照湘淮各軍營制每千
人每月合餉銀六千兩計算每月約共需銀一萬八千
兩此外再寬籌銀二千兩津貼公費綽有餘裕此項月
餉二萬兩卽請

飭下山西撫臣於應協臣軍月餉內劃解陳國瑞以資

支應其軍械一項如但止三千人之數實已敷用無須再給似可不必議增惟臣宗棠軍行靡定勢難隨時查察可否

飭下山西撫臣一併節制該軍遇有違慢由各撫臣隨時查明參辦更可無虞延悞應否如斯伏候

聖裁謹據實覆陳伏乞

聖鑒訓示施行謹

奏 同治七年三月二十八日

郭寶昌受傷給假片

再壽春鎮總兵郭寶昌初十日之戰因急於生擒逆首張總愚夤夜身率輕騎越過賊館十數直逼張逆館前致被伏賊叢傷首領頂右偏受刀傷四領下牙傷一右手背刀傷五勝中洋鎗子二倒卧林間賊意其已死未及加刃旋經其弟郭運昌及劉松山率隊馳援昇歸封邱之岳寨氣息僅存其隨行之輕騎三十餘則人馬均斃矣郭寶昌昨馳函來言比時不省人事次日稍蘇近能啜薄粥當可無虞惟岳寨本是荒村醫藥難覓乞假兩月過河養傷並將受傷時所帶綿風帽委弁齎馳臣

驗刀痕四條長三四寸均深透裏血痕濃染不禁涕
出當准給假養傷札飭記名總兵郭運昌權領該軍聽
劉松山節制調遣卽率所部前來合隊欽奉

上諭嘉賞比又恭錄行知復加存問所有郭寶昌受傷
給假緣由謹附片陳明伏乞

聖鑒謹

奏

軍機大臣 字寄同治七年四月初三日奏

上諭左宗棠奏剿擒獲勝派兵赴山東追剿崇厚奏擒

同治七年四月初五日內閣奉

上諭前因捻匪竄遁河南衛輝一帶迭總諭令李鶴年就地殲除該撫屢次摺奏亦以滅賊自任並稱兵力已敷剿辦毋庸援軍前往助剿乃賊由清化鎮回竄該撫漫無布置任令滑濬等處沿河東趨既未能痛加剿洗復縱賊竄入東境擾及畿疆張曜宋慶等軍曾否出境繞前堦擊亦未見有奏報貽誤軍情實難辭咎李鶴年著交部嚴加議處左宗棠李鴻章總統諸軍由東西大道兩路進剿若能嚴密堵截何至任賊回竄現在該逆

已擾及東光吳橋一帶該大臣等追軍又落賊後調度無方亦有應得之咎左宗棠李鴻章均著先行交部議處仍責令該大臣等督率各軍繞前兜擊逃將此股賊匪剋期殄滅毋再稽延致干重咎欽此

由德州赴天津截剿摺

奏爲官軍由德州啟行循運河西岸馳赴天津力圖截
剿情形仰祈

聖鑒事竊臣前因捻逆由開州南樂向東北竄走臣率

親軍循衛河西岸馳抵大名與劉松山張曜宋慶會師
旋由大名夾衛河兩岸馳赴臨清已於前月二十八日
馳報矣抵臨清後偵賊已竄過運河卽由臨清前進初
四日抵德州偵賊又已越過吳橋向東北竄走是日面
商劉松山張曜宋慶各率所部於初五日分兩起由柘

閱過河取道直隸河間府景州屬連鎮及交河之泊頭
一帶循運河西岸以向天津喜昌春壽各率所部馬隊
作第三起由山東德州屬劉智廟向連鎮泊頭臣與程
文炳率所部作第四起繼之初六日行抵連鎮計張曜
宋慶劉松山已過泊頭喜昌春壽馬隊亦可銜尾繼至
竊維捻逆由吳橋向東北竄走意在逕擾津沽李鴻章
所部郭松林楊鼎勳潘鼎新等三軍早抵吳橋聞已向
天津進發臣昨在德州晤丁寶楨知已嚴催王正起莫
組紳等繞越賊前以援天津是運河以東各軍雲集臣

所部各軍若再由東路繼進則西岸空虛運河水面狹而船隻多勢難斷其西渡倘賊擄船西竄河間保定各屬又將被賊紛擾局勢更壞不若取道遷河西岸覘賊所向相機截擊較爲周妥如確探賊蹤相距不遠卽搭架浮橋東渡會剿或攔頭或橫截屆時各軍自相約會不必候臣調度致有稽延此意已與馬步各軍統領預爲言及察看軍情均知奮勉至李鴻章前此所商圍制一策雖制捻良圖然地遠兵分與現在局勢不合臣已據所見緘復矣頃奉前月三十日

諭旨此次賊由豫直竄入東境搶渡運河寃係何隊攔
截不力著各該大臣督撫等查明嚴叅將該統將等從
重懲辦以肅軍律計李鴻章丁寶楨已據直陳臣不
敢妄有論列惟臣調度無方不能迭殲由直入豫之匪
實爲心疚既不敢飾詞諉過亦不敢希圖引避巧卸仔
肩惟有靜聽

廷議而已所有現籌截剿情形理合據實直陳伏乞
皇太后

皇上聖鑒訓示謹

奏 同治七年四月初七日

軍機大臣奉

旨覽奏與昨日丁寶楨奏報大畧相同已寄諭該大臣等迅速督兵於運河東西兩岸分路截剿以防北竄著卽懍遵疊次諭旨妥籌辦理毋再遲延致干重咎捻匪由直而豫而東直犯津郡剽疾異常官兵卽節落後該大臣既稱不敢飾詞諉過亦不敢希圖引避巧卸仔肩卽當振刷精神力圖補救迅將此股逆匪聚殲無遺以副委任若再事延緩致令遠颺或其東奔西突擾及完

善震驚畿輔徒事跟踪尾擊剿辦迄無成功雖廷議寬大亦不能爲該大臣曲爲優容也懍之此旨併著該大臣抄給李鴻章閱看欽此

委春壽劉松山充當翼長片

再軍營之有翼長原因專責成利分布而設臣軍馬隊初起冗雜殊甚經喜昌到陝訓練經時漸有起色自委充當翼長以來軍務諸有條理深資其力嗣奉

諭旨齊齊哈爾都統春壽臣調度臣與商籌一切察其人樸實忠勇尤有局量現委充翼長將侍衛春山協

領莫爾廣額兩營馬隊隸之至步軍翼長急須擇人劉
松山戰功卓著早邀

聖明洞鑒其人識量恢闊心地篤實寬而有制嚴而不
苛與人共事從無居功諉過之念各統將素所傾服現
委充步軍翼長庶幾馬步各盡其長軍務可期速蒞謹
附片陳明伏祈

聖鑒謹

奏 同治七年四月初七日

賊由天津靜海折竄分道防剿摺

奏爲賊由天津靜海折竄而南臣軍分道防剿恭摺馳

陳仰祈

聖鑒事竊臣於初七日卯刻連鎮行次具摺馳報馬步

各軍逕向天津次第前進拜摺後率所部急馳是日抵
交河之文家廟初八日抵青縣之興濟鎮適接探報賊
於初七日自靜海縣東竄至縣屬四當口尾股尙在天
津縣屬之衛南窪劉松山張曜宋慶等各率所部於初
八日由青縣東北三十里唐官屯渡運河而東向前截

刺春壽喜昌白靜海縣遣弁來詢進止臣已飭其星速
東渡會合步軍前進惟西岸未可空虛臣擬於初九日
在青縣購辦兩三日軍食卽仍由西岸折回過連鎮後
始敢東渡督剿蓋心先固直省逼賊趨東南然後可會
合李鴻章丁寶楨英翰諸軍蹙之河海間也連日奔馳
仍未遇賊愧憤難名南皮界上遇漕運督臣張之萬胞
弟張之京奉老母避難赴德州具述南皮被陷情形頗
悉深咎余承恩畏賊不前距南皮二十餘里任賊破城
飽掠而去張之京在稠人中曾見張逆總愚下馬狀似

負痛四處覓醫療傷甚急有人親見其左肩上鎗子走
出問賊中均言張五孩伏於後於總愚復帶重傷人心
慌亂思散者多惟賊中大小頭目多張姓死黨故受其
劫制賊之能戰者不過數千此次勾賊犯天津實鹽梟
高岩所致高岩滄州下窪高家口人因兵役追捕緊促
糾集鹽梟馬賊約三千人投入賊夥故賊數有增又從
前諸賊盡使長矛此時雙筒洋鎗幾於無賊無之所劫
奪之馬又多是該賊已歷復張之驗所之逃出難民所
言略同臣既有所聞不敢臆默竊謂直東官軍實已數

倍於賊而工卒轉戰疲勞將領虛報勝捷兩者於軍情
實有關繫慮所及謹據實馳報伏乞

皇太后

皇上聖鑒訓示謹

奏

同治七年日月初九日

軍機大臣 字喬同治七年四月十七日奉

上諭左宗棠奏賊由天津靜海折竄而南分道防剿李
鴻章奏行抵東昌所派各軍節節抄前攔剿各一摺捻
逆自靜海縣東竄至縣屬四營口餘股仍在天津縣屬

之衛南淮左宗棠現擬由西岸折回過連鎮後再行東
渡督剿著該大臣星馳前進會合李鴻章等官軍蹙之
河海之間會籌聚殲昨日又明降諭旨催令李鴻章赴
北路其已到之皖豫各軍均歸調度茲覽李鴻章奏報
旬日以來始抵東昌擬赴德州吳橋等處扼紮實形遲
緩捻蹤折回北犯剽疾靡定正宜力圖掃蕩保衛畿疆
以副委任李鴻章身爲統帥合圍旣無把握斷無在賊
縱橫不籌殄滅之理著卽兼程北上與左宗棠和衷商
榷規賊所向迅殲醜類儘再遙延觀望致賊四出紛竄

該大臣問心何以自安丁寶楨現駐交河卽與左宗棠
李鴻章協力同心會籌夾擊英翰所部各營未識行抵
何處著卽起程前進相不策應前諭恩承於河間以北
扼要駐紮應如何與左宗棠等聯給聲援協同剿洗之
處卽著恩承妥爲調度此次南皮被陷余承恩畏賊不
前距南皮二十餘里任賊破城飽掠而去實堪痛恨著
崇厚就近查明據實參奏毋稍徇隱據左宗棠奏現
勾賊犯津寶鹽梟高岩所致高岩係滄州下窪高家口
人糾集鹽梟馬賊約三千人投入賊夥賊數有增等語

亟應將梟匪嚴行搜捕方不致互相勾結捻勢復張著
官文崇厚抽調官軍會同各該州縣地方官將鹽梟認
真緝辦並將匪首高岩逃遁拏獲以孤捻勢直東官軍
實已數倍於賊近聞將領有虛報勝捷等弊著左宗棠
官文丁寶楨崇厚於直東將領中查明何員虛報勝仗
任意欺飾卽著據實嚴參以肅軍律儆扶同徇隱別經
發覺恐該大臣督撫等不能當此重咎也前月二十六
日左宗棠所發摺報尙未遞到卽著查明在何處耽延
仍一面另繕復奏將此由六百里各諭令知欽此

馳抵吳橋會剿摺

奏爲馳抵吳橋敬陳會剿情形恭摺仰祈

聖鑒事竊臣於初九日馳報分道防剿情形後旋即由
興濟鎮東渡沿河岸而南十四日行抵吳橋縣過泊頭
時見運河水勢增長西岸民團齊集各渡口詢問土人
知上流漳衛兩水陡漲丈許較之上年水發最早比抵
連鎮則水已平掃堤根適晤郭松林自天津南趨將抵
德州詢知過捷地時已商同潘鼎新楊鼎勛等將減水
河閘掘開洩水注海靜海青縣滄州一帶藉資郵蔽抵

吳橋聞李鴻章已先一日到德州丁寶楨亦由河間馳至現會籌黃運之防接英翰初七日滑縣道白來緘稱卽向東昌進發所擬制賊之法與李鴻章意見相同并言黃流增漲賊難飛渡也以現在局勢言之賊自津郡折而南趨一入東境東阻大海南阻黃河西則運河一水縈紆足限戎馬之足惟張秋因河流倒灌淤成平陸見值黃運交漲淤沙得水漸潰豈可阻馬足而斷人行李鴻章現與丁寶楨經營黃運之防英翰又適抵東昌兵力更厚東西南三面合天時地利兼而有之又得人

力補幹彌縫當可制賊北面有劉松山張曜宋慶喜昌
春壽王正起莫組紳等馬步大隊追壓而下將士和輯
一心不辭勞瘁軍情實有可恃惟臣與各軍分道後僅
接過劉松山張曜宋慶一次呈報距賊均不過三四十
里以後有無戰事尙未接據續報山東郡縣不知臣駐
軍處所並無偵報申遞近時各處民團爲馬賊所苦見
有騎馬經過者輒予殺害否則拘留不遣縱示以印照
護票亦不見信臣軍所發馬探從無依限馳回者有時
遺步卒雇土人護送前行百數十里外便難蹤跡以故

前敵各軍消息不克時通傾據馬探飛報賊蹤已由武定竄及平原禹城之間追軍已跟蹤前進相距不過十里所有戰事尙未據各軍馳報臣軍與程文炳暫駐吳橋在賊之北一面購備行糧一面偵察賊蹤相機速剿理合據寶馳陳伏乞

皇太后

皇上聖鑒訓示

奏

同治七年四月十七日

劉松山等軍獲勝片

再正拜摺間適據劉松山春壽喜昌宋慶張曜等呈報
十一日追賊至海豐陽信賊復南奔劉松山等馬步各
軍沿途均有擒斬生擒髮捻一百十餘名而奪其馬內
有賊目劉萬落馬玉林兩名比卽說明軍前正法十二
日追及武定府城邊賊衆回撲宋慶於城東率隊迎擊
斃賊數十名獲騾馬二百餘頭賊之大股向武定城南
圍竄西北劉松山張曜春壽各率所部由城西截擊立
斃悍賊百餘鎗礮連環施放賊之應聲而倒者不少十
三日各軍合隊躡追及商河縣北積窪邊賊倉惶無措

劉松山率所部由右張曜率所部由左春壽喜昌率馬
隊分爲兩翼繼之適未慶又率所部由東路馳至各軍
奮威衝殺賊勢不支紛紛亂竄馬步各隊於積潦追殺
二十餘里賊屍枕藉斬馘淹斃者約八百餘名生擒髮
捻約數百計拔出難民一二千名訛據活賊供稱張逆
總愚仍思由運河西岸竄逸蓋不知運河水勢驟漲也
是役受傷弁勇其計五十七員名老湘營副將沈義勝
縱橫血戰胸受鎗傷立隕陣前該員從征多年忠勇素
著一旦中鎗陣亡實堪悼實仰懇

天恩飭部照總兵例從優議卹以慰忠魂而昭激勸謹
附片馳陳伏乞

聖鑒施行謹

奏

同治七年四月十七日

請獎叙中書吳士邁片

再陝西軍務自奉

諭旨命劉典署陝西巡撫以來一切順利臣在軍中無
日不接陝西文武稟報私懷稍爲慰愜頃接劉典鈔摺
咨會並恭錄

批諭見示祇悉一切如果堅持分別剝撫初議隨時立
應西事自有轉機其隨摺請保各員均臣部曲細意察
核實無浮濫惟有原奏所未及而臣所深知如中書科
中書兵士邁一員堅辭保舉遂未及開列臣不敢不據
實籲懇

恩施吳士邁籍隸湖南巴陵敦品立學不求聞達而行
德鄉里甚至素爲士論所與嘗於所居洞庭湖旁廣設
救生船以拯沉溺大湖南北往來商旅羣歌誦之咸譽
二年粵寇攻長沙前湖北撫臣屬其部勒漁戶杜賊北

竄會劇賊奪民船數千由洞庭蔽江而下武漢遂陷時
論頗有議其疎脫者不知書生無官守之責無與兵之
權倉猝邀集漁人以當剽寇又未嘗領公家一錢固未
可以全湖疎防咎之也吳士邁乃引爲罪深自刻責誓
志訓練鄉人子弟求雪此耻咸豐十二年臣入浙時吳
士邁隨已革浙江臬司李元度來營臣見其所練宗岳
軍一營部伍整肅欲留用之時臣方以愾忿不用命遣
撤李元度軍吳士邁義不獨留同治五年冬臣在閩奉
檄督陝甘之

命吳士邁適自湖南來臣延入戎幕途間與之講求與屯以實邊寨裕軍食之策遂令其回湘招舊日宗岳營徒卒爲軍屯用吳士邁旋歸糾合舊部五百人並招集銳卒七百入秦會隊晤時卽言志在力戰雪耻不求保薦如有戰功乞勿請叙臣壯其志而憐其老遇有戰事不欲令其獨前而吳士邁之請益方自入秦以來晝夜訓示士卒諄諄如村塾師啖粗糲臥濕地與下卒共之以此得士心而兼得民譽現據吳士邁稟報三月初八日剿辦竄擾三水淳化逆回大獲奇勝擒賊至數十名

之多兇鋒大挫請錄所部弁卒之功而仍申不求獎叙之約臣究不忍任其掩抑也合無仰懇

天恩俯念中書吳士邁烈士苦心戰功卓著

賞加員外郎銜並

賞戴花翎以示優異而作士氣於世道人心不無裨補謹附片陳明伏乞

聖鑒謹

奏

同治七年四月十七日

同治七年四月二十日內閣奉

上諭左宗棠奏請將戰功卓著之員獎勵等語中書科
中書吳士邁由湖南本籍訓練鄉兵招集銳卒同左宗
棠入陝剿賊此次剿辦竄擾三水等處回匪大獲奇捷
擒馘數千實屬異常出力吳士邁著賞加員外郎銜並
賞戴花翎以示獎勵該部知道欽此

官軍追賊入直兩獲勝仗摺

奏爲官軍由山東平原追賊入直兩獲勝仗現在追剿情形恭摺馳報仰祈

聖鑒事竊臣於十七日在吳橋行營具陳會剿情形及馬步隊獲勝情形後十九日接據甯津縣稟賊於是日竄至縣東南五里之老鴉林是夜五鼓援營向甯津進發二十日午刻行抵甯津縣西關接據劉松山等稟稱賊由荏平折竄十八日各營追賊至平原城東適與賊遇賊見官軍至卽捨命狂奔劉松山張曜宋慶春壽喜

昌共商卽夜銜枚急進襲之劉松山由中路宋慶由右
張曜由左春壽喜昌率馬隊繼之馳五十餘里遇賊各
軍馬步排隊齊進立破馬家集任家集李家樓十餘村
莊村外騎賊四散竄走春壽喜昌由兩邊衝出迤北各
村踞賊亦卽驚潰各軍遇賊卽擊生擒髮捻二百餘名
斃賊約數百名拔出難民數千豫軍馬隊營總陳永春
面受鎗傷甚重弁勇帶傷者尙未及驗悉也十九日大
雨如注三十日丑刻劉松山等昌兩分率所部急進馳
抵甯津屬白家集賊忽返門遇積窪乃下馬拒戰各軍

奮威壓剽賊不能支又經馬隊分途抄襲合隊追殺約
二十餘里賊屍枕藉生擒髮捻二百餘器械輜重尤多
各軍帶傷弁勇三十餘名是日臣率所部及提督程文
炳各營由吳橋抵甯津是夜會晤劉松山等始悉是日
戰勝情形商議分四路追賊劉松山張曜未慶爲三支
向東北春壽喜昌率馬隊繼之臣宗棠並程文炳爲一
支向正北以指滄州捷地滅河二十二日未刻臣宗棠
馳至滅河南岸賈家莊晤善慶溫德勒克西知賊於是
日辰刻猛撲滅河經善慶溫德勒克西擊退賊南竄迤

行而東怡與劉松山等馬步各軍相值如賊沿滅河南岸以向東北則馬步各軍與潘鼎新楊鼎勳防滅河之軍可收夾擊之效逼賊海隅聚而殲之如賊徑向東南則劉松山等軍截之而英翰丁寶楨所部復指武定迤西機局更察臣案棠一面遵

旨將張曜宋慶程文炳春壽馬步各軍咨交李鴻章總統聽其節制調度其郭運昌一軍則已經英翰奏歸統帶矣臣拜摺後仍卽向鹽山一路前進以此時運河水勢尙旺河間一帶暫可無虞而東岸百姓盡過西岸戰

雖不足防則有餘實無須以剿賊之軍代作防局計自
德州以至津沽下游水勢本較甚於上游節交夏令不
至驟行涸退萬一久晴水落臣當急顧兩岸之防不至
疎誤俟到鹽山後再定行止臣之此行原爲滅賊起見
就現在局勢防與剿未可偏廢李鴻章意在先防後剿
臣意在且防且剿兩者並無異同亦似並行不悖若不
顧大局不察時勢但執成見故相阻撓則亦難逃
聖明洞鑒也區區愚忱伏祈

皇太后

皇上聖鑒訓示施行謹

奏

同治七年四月二十三日

賊逼運河馳回吳橋防剿摺

奏爲官軍追賊舊滄州克獲小勝賊折向西南近逼山東運河臣回吳橋相機防剿恭摺馳陳仰祈

聖鑒事竊二十二日辰刻賊北撲滄州滅河石橋經善慶溫德克勒西擊退南竄迤而東向適與劉松山張曜宋慶春壽喜昌馬步各隊相值經臣於二十三日辰刻馳報拜摺後旋即向鹽山進發行抵城西十八里地方探悉賊由西南竄走乃改道向正南是夜抵朱村接劉松山等稟報二十二日賊東竄至舊滄州方圖於滅河

淺處捨渡正窺探間忽見大軍馳至急難繞避乃隕死
黨西來迎拒宋慶率所部衝擊劉松山張曜由北向東
截之鎗炮連環轟擊賊之應聲而倒者甚眾鏖戰半時
賊始敗退進行向西南各軍徑由正南衝殺乃折向東
南以趨鹽山各軍追二十里收隊是役計生擒悍賊一
百餘名略訊數語斬之知賊之北竄意在天津覓購子
藥且掣引追軍與之俱北仍遂其竄撲運西之計劉松
山等仍向東南追擊臣乃引軍而南徑指寧津二十四
日未刻抵寧津劉松山等馳報賊由鹽山掠樂陵而過

邊馬已及德平察賊行蹤南多而西少各軍擬由德平
之北橫出驅令南行而後向西南擊之臣以寧津地雖
居中而賊既由德平南少西竄走追軍又出其北則寧
津自可無虞回竄賊之南竄意在西撲運河則吳橋較
寧津爲要二十五日仍馳回吳橋連日偵探賊蹤已由
臨邑平原向西南而竄代理卓勝營總兵郭運昌二十
五日由恩縣馳報擬於次日赴平原縣南迎擊求與劉
松山合隊勦賊蓋以兩軍素洽不欲離也據陵縣報二
十七日賊已過高唐追軍緊躡其後意郭運昌已躡追

而南而劉松山等馬步各軍亦當距賊不遠矣賊既過
高唐賊必由清平博平莊平以撲運河臣得郭松林二
十一日東昌來緘言已築牆六十里丁寶楨十九日來
緘言牆工限十日竣事以時日計之則賊至牆成西岸
防兵有所憑藉東岸追兵又可速至機局寔爲湊拍賊
如逕竄張秋不能越過則地勢愈逼滅之必矣臣之所
以暫駐吳橋不敢前進者以此地距德州僅五十里可
以北顧直隸運河可以南防狂寇回竄倘賊或竄過西
岸尙可由德州橋口渡師西出截其北竄也謹一併馳

陳伏乞

皇太后

皇上聖鑒訓示施行謹

奏 同治七年四月二十九日

軍機大臣 字寄同治七年閏四月初二日奉

上諭左宗棠奏賊踪近逼山東運河現回吳橋防剿英
翰奏暫駐臨清布置防務並郭運昌等軍擊賊獲勝各
一摺捻股竄舊滄州經未慶等追擊折向東南由鹽山
掠及樂陵德平一帶郭運昌等軍敗賊於思縣城南賊

復走清平縣境是賊之縱橫奔突總思搶渡運河現在
東昌沿運一帶牆工計已竣事追剿各軍不下十萬機
勢實有可乘左宗棠務將運西力加扼守商同英翰丁
寶楨嚴飭劉松山等軍相機夾擊以爲且防且剿之計
其臨清迤北等處並著李鴻章官文趕緊派撥隊伍前
往填紮丁寶楨亦當督同郭松林等嚴扼張秋一路並
與英翰所統各軍聯絡聲勢毋任匪蹤竄越如稍有疏
虞必惟丁寶楨等是問至前敵調派事宜乃李鴻章專
責該大臣務須嚴督淮湘各軍奮加剿擊依限滅賊迅

奏虜公倘日久疎防致賦勢復行延蔓則就各有歸朝
廷不能爲之曲貸也英翰現赴觀音嘴一帶河下著卽
將防務妥爲布置並籌進剿其張從龍一軍卽歸該署
撫調度以厚兵力將此由六百里各諭令知之欽此